


釋氏十
三經註
疏

無量壽經義疏

卷四
之六

冊十



佛說無量壽經義疏卷四

曹魏天竺三藏康僧鎧譯經

隋京師淨影寺沙門慧遠撰疏

△自下第二明其所成。謂成法身淨土之果。然此所成。遂前四十八之大願。應別對之。文顯可知。文中
有二。一略明所成。二佛告阿難無量壽佛威神已
下。廣明所成。

阿難白佛。法藏菩薩爲已成佛。而取滅度。爲未成佛。
爲今現在。佛告阿難。法藏菩薩今已成佛。現在西方。
去此十萬億刹。其佛世界名曰安樂。阿難又問。其佛

成道已來。爲經幾時。佛言。成佛已來。凡歷十劫。其佛
國土。自然七寶。金銀瑠璃珊瑚琥珀磔瑪瑙。合成
爲地。恢廓曠蕩。不可限極。悉相雜廁。轉相間入。光赫
煜爍。微妙奇麗。清淨莊嚴。超踰十方一切世界。眾寶
中精。其寶猶如第六天寶。又其國土。無須彌山。及金
剛圍一切諸山。亦無大海小海溪渠井谷。佛神力故。
欲見則見。亦無地獄餓鬼畜生諸難之趣。亦無四時
春夏秋冬。不寒不熱。常和調適。爾時阿難白佛言。世
尊。若彼國土。無須彌山。其四天王及忉利天。依何而
住。佛語阿難。第三炎天。乃至色究竟天。皆依何住。阿

難白佛行業果報不可思議。佛語阿難。行業果報不可思議。諸佛世界亦不可思議。其諸眾生功德善力。住行業之地。故能爾耳。阿難白佛。我不疑此法。但爲將來眾生欲除其疑惑。故問斯義。

略中有四。第一阿難就身爲問。成佛已未。如來具答。二其佛界下約之明土。三又問下阿難重復就身爲問。成來久近。如來具答。四其國自然七寶已下約之明土。就初段中阿難先問法藏比丘爲已成佛。爲未爲現。此約三世時別以問。佛答可知。第二段中直列彼佛國土名號。未辨其相。第三段中。

先問後答。文顯可知。第四段中。先明所有。又其國土。無須彌下。彰其所無。明所有中。自然寶成。明其體相。恢廓曠蕩。明其量相。悉相雜等。明莊嚴相。明所無中。初先正辨。阿難白下。問答重顯。前正辨中。初無山等。次無四趣。後無四時。春秋等別。後重顯中。文別有三。初阿難問。若無須彌。四天王等。依何而住。如來反質。二阿難正答。如來約之以顯彼事。三阿難彰己爲他故問。非自不知。上來略竟。

△就下廣中文別有四。一明佛身。二卽約身明其徒眾。三明國土。四卽約土明其人民。

佛告阿難。無量壽佛威神光明最尊第一。諸佛光明所不能及。或照百佛世界。或千佛世界。取要言之。乃照東方恆沙佛刹。南西北方四維上下亦復如是。或有佛光照於七尺。或一由旬。二三四五由旬。如是轉倍。乃至照一佛刹。是故無量壽佛號無量光佛。無邊光佛。無礙光佛。無對光佛。炎王光佛。清淨光佛。歡喜光佛。智慧光佛。不斷光佛。難思光佛。無稱光佛。超日月光佛。其有眾生遇斯光者。三垢消滅。身意柔輒。歡喜踊躍。善心生焉。若在三塗極苦之處。見此光明。皆得休息。無復苦惱。壽終之後。皆蒙解脫。無量壽佛光

明顯赫照曜十方。諸佛國土莫不聞知。不但我今稱其光明。一切諸佛聲聞緣覺諸菩薩眾咸共歎譽。亦復如是。若有眾生聞其光明威神功德。日夜稱說。至心不斷。隨意所願。得生其國。爲諸菩薩聲聞大眾所共歎譽。稱其功德。至其最後得佛道時。普爲十方諸佛菩薩歎其光明。亦如今也。佛言。我說無量壽佛光明威神巍巍殊妙。晝夜一劫尚不能盡。佛語阿難。無量壽佛壽命長久不可稱計。汝寧知乎。假使十方世界無量眾生皆得人身。悉令成就聲聞緣覺。都共集會禪思一心。竭其智力。於百千萬劫悉共推算。計其

壽命長遠劫數不能窮盡知其限極。

就初段中應先解釋三佛之義。然後釋文。義如別章。文中初先明佛光相。後顯壽命。前明光中奇歎以顯先別。後結別中有四。一釋迦自歎。二其有眾生遇斯光下。明諸眾生見聞利益。三無量壽光顯赫已下。諸聖共歎。四若有眾生聞其光下。重明眾生見聞獲益。初中有三。一辨勝過劣。無量壽佛光明第一。二諸佛光明所不及下。舉劣顯勝。佛光實等。隨化故爾。三是故下。廣歎顯勝。有十二句。初無量光。無邊無礙。此之三種。當相以歎。無量多也。無

邊廣也。無礙自在也。無對炎王。此之兩種寄對顯勝。他光不敵。名無對光。此光勝餘。名炎王光。清淨歡喜。智慧不斷。此之四種。當相以歎。離垢稱淨。能令見者心悅。名喜。於法善照。名智慧光。常照不絕。名不斷光。難思無稱。超日月光。此之三種。寄對顯勝。過世心想。故曰難思。過世言相。名無稱光。過世色相。名超日月。上來第一釋迦自歎。自下第二見聞獲益。初有遇者。三垢消滅。明除障益。此名三毒爲三垢耳。身意輒等。明生善益。若在三下。明滅苦益。壽終後下。明得樂益。第三共歎。文顯可知。第四

重明獲益之中。初明稱說隨意往生。次爲諸聖咸共歎譽。後明得佛一切共歎。上來別歎。佛言我說無量壽佛光明已下。總以結歎。上來明光下明佛壽。文顯可知。上來第一明其佛身。

聲聞菩薩天人之眾。壽命長短亦復如是。非算數譬喻所能知也。又聲聞菩薩其數難量。不可稱說。神智洞達。威力自在。能於掌中持一切世界。佛語阿難。彼佛初會。聲聞眾數不可稱計。菩薩亦然。如大目犍連百千萬億無量無數。於阿僧祇那由他劫。乃至滅度。悉共計校。不能究了多少之數。譬如大海深廣無量。

假使有人析其一毛以爲百分。以一分毛沾取一滴。於意云何。其所滄者。於彼大海。何所爲多。阿難白佛。彼所滄水。比於大海多少之量。非巧歷算數言辭。譬類所能知也。佛語阿難。如目連等於百千萬億那由他劫。計彼初會聲聞菩薩所知數者。猶如一滄。其所不知如大海水。

第二約身明眾。於中有四。一明其土人壽長遠。如無量壽。二又聲聞下明其眾多。三神智洞下彰其德勝。四重顯眾多。且就初會顯其多相。餘不可論。初會聲聞不可稱計。菩薩亦然。當不辨多相。就目

連不知以顯。於中初明目連不知。如大海下借事顯之。佛先立喻。反問阿難。次阿難答。下佛約之。彰顯目連所知多少。

△自下第三明其國土。是中應先解淨土義。然後釋文。義如別章。文中汎論有三莊嚴。一事莊嚴。色香味等五欲精上。二法莊嚴。純論妙法。三人莊嚴。勝善眾生居住其中。今此所明國土勝中。有事莊嚴。及法莊嚴。下第四段人民殊勝。是人莊嚴。然彼土中莊嚴妙事。不可具辨。今此文中略舉四事。一明寶樹。二明伎樂。三明講堂宮殿等事。四明寶池。

又其國土七寶諸樹周滿世界。金樹銀樹瑠璃樹玻
璃樹珊瑚樹瑪瑙樹碑磬之樹。或有二寶三寶乃至
七寶轉共合成。或有金樹銀葉華果。或有銀樹金葉
華果。或瑠璃樹玻璃爲葉華果亦然。或水精樹瑠璃
爲葉華果亦然。或珊瑚樹瑪瑙爲葉華果亦然。或瑪
瑙樹瑠璃爲葉華果亦然。或碑磬樹眾寶爲葉華果
亦然。或有寶樹紫金爲本。白銀爲莖瑠璃爲枝。水精
爲條珊瑚爲葉。瑪瑙爲華。碑磬爲實。或有寶樹白銀
爲本。瑠璃爲莖。水精爲枝。珊瑚爲條。瑪瑙爲葉。碑磬
爲華。紫金爲實。或有寶樹瑠璃爲本。水精爲莖。珊瑚

爲枝。瑪瑙爲條。碑礫爲葉。紫金爲華。白銀爲實。或有
寶樹。水精爲本。珊瑚爲莖。瑪瑙爲枝。碑礫爲條。紫金
爲葉。白銀爲華。瑠璃爲實。或有寶樹。珊瑚爲本。瑪瑙
爲莖。碑礫爲枝。紫金爲條。白銀爲葉。瑠璃爲華。水精
爲實。或有寶樹。瑪瑙爲本。碑礫爲莖。紫金爲枝。白銀
爲條。瑠璃爲葉。水精爲華。珊瑚爲實。或有寶樹。碑礫
爲本。紫金爲莖。白銀爲枝。瑠璃爲條。水精爲葉。珊瑚
爲華。瑪瑙爲實。行行相值。莖莖相望。枝枝相準。葉葉
相向。華華相順。實實相當。榮色光曜。不可勝視。清風
時發。出五音聲。微妙宮商。自然相和。又無量壽佛。其

道場樹高四百萬里。其本周圍五千由旬。枝葉四布二十萬里。一切眾寶自然合成。以月光摩尼持海輪寶。眾寶之王而莊嚴之。周帀條間垂寶瓔珞。百千萬色種種異變。無量光炎照曜無極。珍妙寶網羅覆其上。一切莊嚴隨應而現。微風徐動。出妙法音。普流十方。一切佛國。其聞音者。得深法忍。住不退轉。至成佛道。不遭苦患。目覩其色。耳聞其音。鼻知其香。舌嘗其味。身觸其光。心以法緣。一切皆得甚深法忍。住不退轉。至成佛道。六根清徹。無諸惱患。阿難。若彼國土天人。見此樹者。得三法忍。一者音響忍。二者柔順忍。三

者無生法忍。此皆無量壽佛威神力故。本願力故。滿足願故。明了願故。堅固願故。究竟願故。佛告阿難。世間帝王有百千音樂。自轉輪聖王。乃至第六天上。妓樂音聲。展轉相勝。千億萬倍。第六天上。萬種樂音。不如無量壽國諸七寶樹。一種音聲。千億倍也。樹中初先汎明諸樹。第二別明道場之樹。三總就之。校量顯勝。前汎明中。先列其樹。後明出聲。就列樹中。其國寶樹。周滿世界。總以標舉。金銀樹等。明純寶樹。或二寶下。明雜寶樹。所出聲中。出五音者。所謂宮商角徵羽等五種音也。第二所明道場樹。